

SCRIPT OF MORNING GOJRI NEWS BULLETIN 25AUG 1015 HRS

ما رننگ گو جری نیو ز بلیٹن مو رخہ 25 اگست 2025

یوہ آکا شوانی جموں ہے عبدل الرحمان تیں خبر سُنو۔

RAJNATH CHASOTI

وزیر دفاع راج ناتھ سنگھ نے اتوار غے روز کہیو ہے جے مرکز حکومت ضلع کشتواڑ مانہہ حالیہ بدل پھٹن غا واقع تیں متاثرہ افراد نانہہ راحت تے باز آبادکاری فراہم کرن واسطے تمام تر کوشش کر رہی ہے واضع رہ جے یوہ تباہ گن واقعیو ضلع کشتواڑ غا چسوٹی گراں مانہہ پیش آیو تھو راج بھون جموں تیں ویڈیو کانفرنسنگ غے ذریعے متاثرہ چسوٹی گراں غی صورتحال غو جائیزو لیتا واں راج ناتھ سنگھ ہوراں نے کہیو ہے جے یوہ ہوصلہ افزاء گل ہے جے یوٹی انتظامیہ فوج این ڈی آر ایف ایس ڈی آر ایف تے پولیس نے اس بحران غے دوران بہترین کم کیو ہے اس تیں انہاں نے گورنمنٹ میڈیکل کالج جموں گو دورو کیو تے زخمی افراد غی خیریت دریافت کی یہ زخمی افراد حالیہ بدل پھٹن غا واقع مانہہ ضلع کشتواڑ غا چسوٹی گراں مانہہ متاثر ہوا تھا۔

NATIONAL MISSION

مرکزی وزیر ڈاکٹر جتندر سنگھ نے کہیو ہے جے بدل پھٹن غا واقعات غا مطالبہ واسطے ایک قومی مشن قائم کیو گیو ہے جہڑو جموں کشمیر ہماچل پردیش تے اُتراکھنڈ جیسا ہمالیائی خطاں مانہہ کم کرے گو یوہ مشن عوام تے عہد داراں نانہہ مستقبل مانہہ پیش آن آلا خطرات غا بارے مانہہ خبردار کرن مانہہ مددگار ثابت وے غو۔ ذرائع ابلاغ سنگ گل بات کرتا واں ڈاکٹر جتندر سنگھ نے کہیو ہے جے اگر چہ بدل پھٹن غا واقعات غیدرست پیشن گوئی فیالحال ممکن نہیں ہے لیکن یو مشن حساس علاقاں غی نشاندہی کرے گوتے ایک ابتدائی نظام قائم کرے گو یوہ قدم وزارت سائنس و ٹیکنالوجی تے زمینی سائنس غے تحت ہے جس غو مقصد بروقت احتیاطی اقدامات واسطے لوکاں تے عہدیداراں نانہہ مُتنبہ کرنو ہے انہاں نے مزید کہیو ہے بھارت محکمہ موسمیات آئی ایم ڈی غو ایک علاقائی مرکز جموں مانہہ قائم کیو جے غو جہڑو صرف اس خطہ غی خدمت کرے غو۔

RANA FLOOD

محکمہ جل شکتی غا وزیر جاوید احمد رانا نے کل جموں کشمیر غی سیلاب غے متعلق تیاریاں گو جائیزو لیو ہے یوہ میٹنگ چیف انجنیر تے دوجا سنئیر افسراں غے سنگ منعقد ہوئی تانجے جاری مونسون یعنی برساتی موسم غے پیش نظر حکمت عملی تیار کی جاسکے انہاں نے ہنگامی حالات سنگ نمڑن واسطے درکار تیاریاں تے بُنیادی ٹہانچاں گو جائیزو لیو خاص طور ور اُن علاقاں مانہہ جہڑہ سیلاب گا زیادہ خطرہ تیں دوچار ہیں وزیر موصوف نے برا دریاواں غا نظام جس طرح کہ جہلم راوی ت توہ مانہہ پان غی سطح غی 24 گھنٹہ نگرانی غی ہدایت دتی انہاں نے ابتدائی انتہائی نظام ور زور دیتا واں تمام متعلقہ محکماں نانہہ بروقت اطلاعات فراہم کرن غی ہدایت کی تانجے فوری تے مربوط اقدامات نانہہ یقینی بنایو جاسکے۔

SDRF

ریاستی قدرتی آفات تدارک دستی غی ٹیم جموں مانہہ شدید بارشاں غے بعد بچاؤ آپریشن مانہہ سرگرم ہیں کیونجے ان بارشاں سنگ شدیائی بھراو غی صورتحال پیدا ہوئی ہے تے روز مرہ غی زندگی مانہہ خلل پیدا ہووے خصوصی آلات سنگ لیس ٹیمیں نے بہت سارہ پھسیا واہ رہائشیاں نانہہ بچایو ہے جن مانہہ آئی ایم ہو سٹل غا 45 طلبہ وی شامل ہیں جنہاں نانہہ ریڑ غی تے لائف جکٹس غے ذریعے کڈیو گیو ہے ایس ڈی آر ایف غی فوجی ہٹالین جموں گا ڈی وائی ایس پی دنیش گپتا غی قیادت مانہہ تالاب تلوت لاور بخشی نگر غا علقہ جہڑہ دریائے توی غے نیڑے ہے جیسا سیلاب زدہ علاقہ مانہہ آپریشن جاری ہیں اید ڈی آر ایف مقامی عہد داراں غے سنگ قریبی تعاون کر رہی ہے تانجے فوری ت مربوط بچاؤ اقدامات نانہہ یقینی بنایو جاسکے۔

SCHOOLS CLOSED

خراب تے ناموافق موسمی حالات غے پیش نظر محکمہ سکولی تعلیم غا جموں ڈائریکٹوریٹ غی طرفوں اج جموں خطہ غا تمام سرکاری ونجی سکول بند کرن غا حکم دتا گیا ہیں یو قدم پاری بارشاں تے مزید خراب موسم غی وارنگ تیں بعد طلبہ غی حفاظت غے پیش نظر لیو گیو ہے اسے دوران سکینڈری تعلیم بارے جموں کشمیر بورڈ غی دسویں تے بارویں جماعتاں غا اج واسطے طہ شد امتحانات مرکزی زیر انتظام علاقہ جموں و کشمیر تے لداخ مانہہ خراب موسم غی وجہ سنگ ملتوی کردتا گیا ہیں ملتوی ہوا امتحانات غی نویں تاریخاں گو اعلان بعد مانہہ کیو جے گو۔

WEATHER

محکمہ موسمیات نے پیش گوئی کی ہے جے جموں غا کئی علاقہ مانہہ ہلکی تیں درمیانی بارش تے گرج چنک وے گی جد کہ بعض مقامات ور پاری تیں شدید بارش ہو سکے جن مانہہ ریاستی ادھمپور سانہہ کٹھوعہ تے راجوری وی شامل ہیں اسے دوران درمیانی تیں شدید بارشاں نے پونچھ رام بن ڈوڈہ کشتواڑ وادی کشمیر غا کچ حصاں نانہہ متاثر کی وے عہدے داراں نے رہائشیاں نانہہ ہدایت دتی ہے جے وے چوکس رہیں تے ضروری احتیاطی تدابیر اختیار کریں خاص طور ور اُن علاقہ مانہہ جہڑہ سیلاب تیں متاثر تے نشستیں ہیں کیونجے خطہ مانہہ مونسون غی ہل چل جاری ہے۔

WUSHU TRIALS

ترے روزہ ایشیائی کھیڈاں مانہہ ووشوس واسطے آزمائش غو اختتام کل سرینگر غا شیر کشمیر انڈور کھیڈ کمپلیکس مانہہ ہوو جس مانہہ تقریباً دو سو کھیڈاریاں نے ساندہ مقابلہ مانہہ حصو لیو ہروزن غا زمران مانہہ 7 کھیڈاری نانہہ اگلہ مرحلہ واسطے مُنتکب کیو گیو ہے واضع رہ جے جموں کشمیر گا 12 کھیڈاریاں نے چُنیا گیا کھیڈاریاں مانہہ جگہ بنائی ہے عہدے داراں نے اس موقع ور کھیڈاریاں غی کارکردگی نانہہ سپہرایو ت بھارت غا مڈل جتن غا امکانات ور اعتماد غو اظہار کیو۔

PTC ANN

علاقائی خبراں آلا شعبہ آکاشوانی جموں غی طرفوں ضلع جموں واسطے عارضی نامہ نگاراں یعنی پی ٹی سی واسطے درخواست منگی گئی ہیں مجوزہ پرفارمہ ور عارضی نامہ نگار غی پوسٹ مانہہ دلچسپی رکھن آلا ایسا امیدوار درخواست دے سکیں گا جہڑا ضلع جموں

گا بسنیک ویں تے اُن غی عمر 24 براں تیں 50 براں غے بشکا ر وے۔ پی ٹی سی غی اس
پوسٹ واسطے تعلیمی قابلیت پی جی ڈپلومہ یا صحافت غا شعبہ مانہ ڈگری یافر تسلیم شدہ
یونیورسٹی تیں گرجویشن غے ہمراہ 2 براں غو صحافت مانہ تجربو مقرر کیو گیو ہے۔ اس تیں
علاوہ کمپیوٹر تے ورڈ پروسیسنگ نالے خبر اکٹھی کرن آلا آلات تے میڈیا کوریج مانہ تجربو
وی ضروری ہے۔ عارضی نامہ نگار غی پوسٹ مانہ دلچسپی رکھن آلا امیدوار واسطے لازمی
ہے جے ضلع صدر دفتر جموں یا اس تیں 10 کلو میٹر غادائرہ غے اندر رہائش پزیر وے اس
سلسلہ مانہ درخواست غی ہارڈ کاپی ضروری دستاویزات غے ہمراہ ہیڈ ریجنل نیوز یونٹ
آکاشوانی پنچترتھی جموں مانہ بزات خود
آئیندہ 31 اگست 2025 توڑی دے سکیں۔ اس بارے مزید جانکاری ویب سائٹ
www.newsonair.gov.in-ور دستیاب ہے
